

•sanjvwnz•

Vagimngaenz

金 银 花

□ Vangz Civeij / 黄志伟

Raen daxmeh guh fwen, ndawsim gou humz-nyabnyab, nyaenz gou couh ciengq go hwnjdaeu:

“Mwngz hai youq laj daengngoenz, coh heuhguh vagim,

Mwngz hai youq lai ronghndwen, coh heuhguh va’ngaenz,

Va mwngz ronghriri, bouxlauz daeuj ndaej bij(bei)?

Gaeu de heu, mbaw de loeg, yawj bae daengx da doek,

Daeuj lo daeuj,

Vagimngaenz, Vagimngaenz, mwngz miz cingz, mwngz miz eiq……”

Mehlwg youq ndaw bya fwen hwnj fwen roengz, mbouj rox daengngoenz seizlawz doek roengz bo? Seizde, mbouj miz cung venj caeuq soujbiuj, guhhong souhong cij ndaej yawj aen daengngoenz guhgoek. Daxmeh naeuz: “Raeuz dauqbae lo!” Yienzhaeuh de couh aemq daeh vagimngaenz youq gizsang byaij roengzdaeu, gou ngamq gip ndaej byongh daeh ndeu. Youq mwh gou byaij roengzdaeu seiz, ngaiz gaeu vagimngaenz laeuz haeuj din daeuj, gou couh hoemjgoep lo, din swix loemq roengz congh rin bae, lwed lae mbouj dingz. Daxmeh yungh fag caxliemz gvej buh de, gip go ywdoj dub lanh ok raemx baeng haeuj giz sieng gou bae, caiq aeu baengz buh de suek gij sieng gou, cij aemq gou dauqranz. Daxmeh aemq gou bae ndaej duenh roen ndeu cuengq roengz, youh byaij dauqlaeng aeu daeh vagimngaenz, baebae dauqdaucib lai mbat, daengz ronghndwen hwnj bo le, dou cij dauq daengz ranz.

Mwhde, aenvih baksieng gou mbouj ndaej siudoeg ndei, gvaqlaeng baksieng fanj in moq, faj din swix foeg lumj aen haeuxfaengx nei, youh ndongj youh in. Daxmeh dauzheiq lo, buet daengz mbanjrog bae heuh boux canghyw doj daeuj hawj gou ywbingh. Seizde, ndawranz hojgungz, daxboh youh baenz bingh fungheiq, mbouj ndaej guhhong, cungj dwg daxmeh bae ra ngaenz. Daxmeh vihliux gou caeuq daxboh ndaej ywbingh, ciengzciengz hwnq romh haeuj rungh haeuj bya bae ra go baenz ngaenz bae gai, mbanjseiz lij bungq daengz ngwzdoeg haep. It bi seiq geiq, ndaw rungh ndaw bya cungj miz rizdin daxmeh. Doeklaeng, gij bingh daxboh caeuq gou ndaej yw ndei lo. Seizneix, gij din gou lij ce miz aen biuj seizde bungq, baez yawjraen aen biuj neix, couh lumj yawjraen daxmeh nei.

Gyongq dou gyaex sij di faenzcieng guh aen vwnzyozse, heuhguh Nazlaur Nungzminz Vwnzyozse,

ndawde miz boux veiyenz ndeu heuhguh Vangz Ginhbungz. De dwg bi 2018 haeuj ndaw vwnzyozse daeuj, gaxgonq de sij haujai faenzcieng ndaej fatbiuj, gou yawj gvaq faenzcieng de, hoeng caengz ndaej raen gvaq de. Bi’ gvaq ndwen haj ngoenz it, vwnzyozse dou youh doxcomz, de hai aen cimohdoz sai le sam aen lai cungdaez ganj daeuj, mwhde gou cij ndaej raen naj de. De sang saek miz mij roek haj, byomregreg, mbouj maij gangj vah geijlai.

Bineix, dwg vwnzyozse dou laebbaenz gouj hopbi, gou iucingj yienh rog veiyenz daeuj doxcomz, de hix daeuj lo. Guh hozdung liux lo, gou iu de daengz ranz gou gwn laeuj. De daj aen daeh aemq de dawz bingz laeujdoj he okdaeu, caiq dawz aen daeh he okdaeu ndenq hawj gou. Gou cam: “Neix dwg maz?” De naeuz: “Vagimngaenz!” Gou doeksaet lo, gij heiq rang yaep seiz ndonj haeuj ndaw ndaeng gou daeuj, con haeuj ndaw bwt gou bae. Haeujsim menh yawj, vagimngaenz lij ndij mbaw doxrangh, gij mbaw heusauj, gij va henjgim.

Vangz Ginhbungz naeuz: “Secangj, bi’ gvaq daxmeh gou itcig baenzbingh, gou couh youq ranz ganq daxmeh. Duenh gyawj neix, daxmeh ndaw ndat okhaex mbouj daeuj, gou dingq vunz naeuz, vagimngaenz goj ndaej siundat gejdoeg, gou ndonj cib rungh gouj bya, ra cib bo gouj dat, cij ra raen go vagimngaenz. Gou rox mwngz miz bingh hezyaz sang, swnhbienth dawz di vagimngaenz hawj mwngz, maqmuengh mwngz ndang ndei ndang cangq!”

Gou baez dingq, gaem fwngz de maenh-ndaetndaet, raemxda gou iemq youq baihdaw, gangj mbouj okbak lo. (2 sat)



Gungcanjdangj Ndei Lai

共产党真好

□ Luj Sauh

Laeb guek caetngeih bi,
Daj iq bienq giengzdaih,
Gungcanjdangj ndei lai,
Raeuz simhai najrongh.

Caengz gaijfang gaxgonq,
Bae gwngonz dicuj,
Naed haeux mbouj ndik yuz
(youz),
Ndag byombyu rengz naiq.

Miz vah gangj mbouj ndaej,
Siengj daej daej mbouj ok,
Souh saw gyaux byaeknok,
Fouq ndok byom lumj fwnz.

Gungcanjdangj lingjdauj,
Daiq raeuz gauj gwzming,
Doihraeuz gyongq lwgminz,
Ndaej binjdang(fanndang)
guhcauj.

Nyoengxlaemx “sam goengq
bya”,
Ung suenva hoengzoq,
Gizgiz bienq yiengh moq,
Gungzhoj bienq fouqmiz.

Ngamq laeb guek goeknduj,

Gizlawz duj(cungj) ndoqndang,
Deng guek rog haephangz,
Guek minz gyangz haemzhoj.

Gungcanjdangj lingjdauj,
Daiq raeuz gauj gensez,
Gunghyez caeuq nungzyez,
Gak hangzyez hoenghvuengh.

Gyauoeng goj fatdad,
Lwgminz dab siujgangh,
Haeux rim loengx rim cang,
Gozfangz engq maenh’ak.

Guek fouq lwgminz giengz,
Yienghyiengh gauj hwnjbae,
It ngoenz it mbaek lae,
Doxbae engq fanzyungz.

Aen dangj cungjsuhgi,
Gizgiz aeu minz eiq,
Cunz daengx guek biengzdeih,
Maeuzleih hawj lwgminz.

Bya heu raemx goj saw,

Naedcaw myebmyeb rongh,
Ndaw doengh caeuq gyang-
hongh,
Mak duengh gva byaek oi.

Gyauoeng gig fuengbienth,
Seiqmienth lumj muengxgyau,
Naengh feihgih baedauq,
Saumbauq seng’eiq vuengh.

Saedcej ngoenzngoenz ndei,
Mbouj youheiq gwndaenj,
Bouxlauz caeuq lanlaenj,
Caez danqhaenh dopfwngz.

Ranzhaz bienq ranzlaeuz,
Mou ma bit gaeq lai,
Ciengx yiengz caiq ciengx vaiz,
Fatcaiz bouxboux angq.

Gwn raemx gaej lumz mboq,
Haengzoq(fouqmiz) gaej lumz
dangj,
Caez simvuen angqyangz,
Riengz dangj bongh siujgangh.



•Sawcuenhraz Lwngnyez•

Gij Golwngnyez Henz Dahhoengz

红 水 谣

□ Lanz Haijyangz Moz Beibei / 蓝海洋 莫蓓蓓

Miz ngoenz ndeu, Lungz Byauh gag baengh youq gokciengz aeu diuz fiengz he gviq gij baksieng, bouxfamhlaux byaengqda, song lwgda de ronghmyanmyan cim Lungz Byauh, sing daemq cam le coenz ndeu:

“Gvenq luba?”

Lungz Byauh gig doeksaet, liuh mbouj daengz bouxfamhlaux neix lij rox gangjavah.

“W.”

“Gig ndei.” Bouxfamhlaux muengh coh gahengh Lungz Byauh naeuz: “Deng gyoengqde dub sieng?”

“Mbouj suenq, gaxgonq couh deng ngwzdoeg haeb lo, deng gyoengqde baez dub, couh engq naeuh

lo.”

“Ha!”

“Ngwzcaetyamq.”

“Suenq mwngz mingh ndei,
ngwzcaetyamq haeb mwngz lij
mboujcaengz dai.”

“Hei hei!”

“Rox gij ywdoj yw deng ngwz-
doeg haeb lwi?”

“Mbouj rox.”

“Saeh geizheih lo.”

“Miz duzyou baujyouh.”

“Vahhoengq!” Bouxfamhlaux youh laep da gangjgvege, “gou loengh duzngwz ndaej samcib lai bi lo, danghnaeuz baengh duzyou baujyouh, gaengq dai lo.”

(caengz sat)